

## NORÜ TAXRE GA POPERA GA TIMUTÉUCA X NAXÜMATÜXÜ GĀ PAURU

### *Timutéuxü narümoxë ga Pauru*

<sup>1</sup> Pa Timutéux, choma i Pauru nixĩ i cuxcèx chanaxümatüxü i ñaã popera. Rü choxü nixĩ ga namuxü ga Ngechuchu ya Cristu, yerü yemaãcü nanaxwèxe ga Tupana. Rü nüma choxü namu na nüxü chixuxücèx na ñuxãcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxõgügu.

<sup>2</sup> Cuxü changechaü, Pa Chaune, Pa Timutéux. Rü chanaxwèxe ya Tanatü ya Tupana rü Ngechuchu ya Cristu ya tórü Cori na cuxü nangüxëëgüxü rü nüxü cungechaütümüügüxü rü cuxü nataãxëëgüxü.

### *Tama name i taxãne na Cristuchigaxü ixuxü*

<sup>3</sup> Guxüguma i chütacü rü ngunecü rü cuxna chacuèxãchixü i chorü yumüxëwa, rü poraãcü cuxcèx moxë Tupanana chaxã. Rü nüxü nixĩ i chapuracüxü i mexü i chauãëmaã, yexgumarüü ga nuxcümaügüxü ga chorü oxigü naxügüxürüü.

<sup>4</sup> Choma rü nüxna chacuèxãchi na ñuxãcü poraãcü chauxcèx cungechaüxü rü chauxcèx cuxaxuxü ga yexguma cuxna íchixüxgu. Rü wenaxãrü cuxü chadauxchaü na aixcüma chataãxëücèx.

<sup>5</sup> Erü nüxna chacuèxãchi na ñuxãcü aixcüma Tupanaãxü cuyaxõxü. Rü curü noxë ga Loída rü cue ga Euníchia rü tüma rü woetama tüxira Tupanaãxü

tayaxõgü rü nüxü chacuèx i ñuxma rü cuma rü ta aixcüma cuyaxõxü.

<sup>6</sup> Rü ngëmacèx cumaã nüxü chixu na cugü cuporaxëèxü na yexeraãcü cunaxüamaxüçèx i ngëma Tupanaãrü puracü ga naxcèx cuxna naxããxü ga cuèx ga yexguma noxri cuxü chingõgüãcüma cumaã chayümüxëgu.

<sup>7</sup> Yerü Tupana rü tama tüxna nanamu ga naãë i tüxü muëèxü. Natürü tüxna nanamu ga Naãë i Üünexü na tüxü naporaxëèxüçèx na aixcüma duüxügüxü ingechaügüxüçèx rü meã yigümaã icuáxüçèx.

<sup>8</sup> Rü tama chanaxwèxe na cuxãnexü na nüxü quixuxü i nachiga ya tórü Cori. Rü ngëxgumarü ta tama chanaxwèxe i chauxcèx cuxãne i ngëma na chapoxcuxü naxcèx i Tupanaãrü ore. Rü name nixi i yaxna namaã cuxĩnü i ngëma ngüxü i cuxcèx ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë.

<sup>9-10</sup> Rü Tupana tüxü namaxëxëë rü tüxü nade na naxcèxicatama imaxëxüçèx. Natürü tama tacü rü mexü na ixüxügagu nixi ga yemaãcü tamaã namecümaxü ga Tupana. Natürü yemaãcü tüxü narüngüxëë yerü woetama yema nixi ga nanaxwèxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaücü, rü yexguma ínguxgu ga tórü maxëxëëruü ga Ngechuchu ya Cristu, rü yexguma nixi ga Tupana tüxü nüxü dauxëèxü na ñuxãcü poraãcü tüxü nangechaüxü. Rü nüma ga Cristu nixi ga iyanaxoxëëãxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuèxëë na

yixema rü ta tüxü nangẽxmaxü i ngẽma maxü i taguma gúxü ega nüxü yaxõxgu.

<sup>11</sup> Rü Tupana choxü ningucuchixẽẽ na nüxü chixuxücèx i ngẽma norü ore i mexü. Rü choxü namu na ngẽma oremaã chanangüexẽẽxücèx i duüxügü i guxüwama.

<sup>12</sup> Rü ngẽmacèx nixĩ i poraãcü ngúxü chingexü rü chapoxcuxü i ñuxmax. Natürü tama naxcèx chaxãne i ngẽma, erü choma nüxü chacuèx na texéaxü chayaxõxü. Rü nüxü chacuèx na naporaxü i nüma na nüxna nadauxücèx i ngẽma puracü i choxna naxãxü rü namaã inacuáxücèx i chauãẽ i guxügutáma ñuxmatáta ngẽma ngunexü i nagu wena núma naxüxü.

<sup>13</sup> Rü chanaxwèxe i meãma nagu quixü i ngẽma nguxẽẽtae i mexü ga chauxütawa naxcèx cungúxü. Rü name nixĩ i meã nüxü cuyaxõõma ya Ngechuchu ya Cristu rü meã nüxü cungechaü i guxüma i duüxügü, erü Cristuarü duüxü quixĩ.

<sup>14</sup> Rü name nixĩ i Tupanaãẽ i Üünexü i tawa maxüxüãrü ngüxẽẽmaã ícunapoxü i ngẽma nguxẽẽtae i mexü i Tupana cuxna äxü.

<sup>15</sup> Cuma marü nüxü cucuèx rü guxüma ga yema yaxõgüxü ga Áchiaarü naãnewa ne ìxü rü marü choxna naxígü. Rü yematanüwa nayexma ga Figueru rü Ermóquene.

<sup>16</sup> Onesíferu rü muẽxpüxcüna choxü nataãẽxẽẽ, rü tama chauxcèx naxãne i ngẽma na chapoxcuxü. Rü ngẽmacèx chanaxwèxe i tórü Coriaxü nangechaütümüügü i guxüma i natanüxügü.

<sup>17</sup> Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxü iyangau.

18 Cuma meãma nüxũ cucuèx ga ñuxãcü tüxũ na nangũxẽẽxũ ga Onesíferu ga Epéchiuarü ñãnewa. Rü ngẽmacèx chorü yumüxêwa naxcèx íchaca na Tupanaãxũ nangechaütümüxũcèx i ngẽxguma wena ñoma i naãnewa naxũxgu ya tórü Cori ya Ngechuchu.

## 2

*Ngechuchu ya Cristuarü puracütanüxũ i mexũchiga*

<sup>1</sup> Rü ñuxma, Pa Chaune, Pa Timutéux, jrü cugü naporaxẽẽ namaã i ngẽma pora i Ngechuchu ya Cristu cuxna ãxũ!

<sup>2</sup> Yema ore ga chauxütawa nüxũ cuxĩnüxũ ga yexguma muxũma ga duũxũgüpêxewa nüxũ chixuxgu, rü chanaxwexe i ñuxma cuxi ngẽma oremaã cunangüexẽẽ i togü i yatügü i meã naãẽxũ cuèxgüxũ na nüxĩ togüxũ nangüexẽẽxũcèx namaã i ngẽma ore.

<sup>3</sup> Rü tama name i naxcèx cumuũ na Ngechuchu ya Cristuarü oregagu ngúxũ quingexũ. Natürü name i namaã cupora ñoma wüxi i mexũ i norü churararüũ.

<sup>4</sup> Rü wüxi i duũxũ i churarawa ngẽxmaxũ, rü taxucürüwama to i puracü i tama churaraarü ixĩxũgu narüxĩnü. Natürü ngẽma norü ãẽxgacü nagu namuxũ i puracügu nixĩ i naxĩnüxũ na ngẽmaãcü norü ãẽxgacüxũ nataãẽxẽẽxũcèx.

<sup>5</sup> Rü ngẽxgumarüũ ta wüxi i duũxũ i wüxi i ññucawa nügü ingucuchixẽẽxũ, rü taxuacüma nanayaxu i norü ãmare ega chixri naxĩnücèxwèxegu rü tama ngẽma ññucaarü ãẽxgacüga naxĩnügu.

<sup>6</sup> Rū texé ya nañnewa puracüxe rü name nixĩ i tũxira tanayaxu i tũmanetũarũ o.

<sup>7</sup> ¡Rũ guxũguma nagu rüxĩnũ i ñaã ore i cumaã nüxũ chixuxũ! Rũ nüma ya Cori ya Ngechuchu tá cumaã inananguxũxẽẽ i guxũma na nüma nanaxwèxexũãcũma cunaxũxũcèx i ngẽma puracũ.

<sup>8</sup> ¡Rũ nüxna nacuèxãchi ya Ngechuchu ya Cristu ya Dabitanũxũ ga guma yuwa írũdacũ! Rũ yimachiga nixĩ i ngẽma ore i mexũ i duũxũgũmaã nüxũ chixuxũ.

<sup>9</sup> Rũ ngẽma oregagu nixĩ i ngúxũ na chingexũ rü ñoma wũxi i mãetaxũrũũ núma poxcupataũwa cadenamaã chichotaxũ. Natürũ Tupanaãrũ ore i mexũ, rü guxũwama nanguama rü taxucürũwama texé tayachota.

<sup>10</sup> Rũ ngẽmacèx yaxna namaã chaxĩnũ i ngẽma ngúxũ i chingexũ naxcèx i ngẽma duũxũgũ i Tupana dexũ. Erũ chanaxwèxe i nümagũ rü ta Ngechuchu ya Cristuaxũ nayaxõgũ, rü ngẽmaãcũ na nayauxgũãxũcèx i maxũ i mexũ i taguma gúxũ.

<sup>11</sup> Rũ pemaã nüxũ chixuxchaũ i wũxi i ore i aixcũma ixĩxũ. Rũ ngẽxguma Cristu yuxũrũũ norũ orecèx iyuegu, rü naxrũũ tá ta wena tamaxẽ na nüma ínangẽxmaxũwa ingẽxmagũxũcèx.

<sup>12</sup> Rũ ngẽxguma ñoma i nañnewa yaxna namaã ixĩnũẽgu ega ngúxũ ingexgu, rü daxũguxũ i nañnewa rü wũxigu namaã ãẽxgacũ tá tixĩgũ. Rũ ngẽxguma tama Cristuxũ icuáxchaũgu i ñoma i nañnewa, rü nüma rü tãũtáma tũxũ nacuáxchaũ i daxũguxũ i nañnewa.

<sup>13</sup> Natürũ woo ñuxguacũ i yixema rü tama aixcũma naxũxgu i ngẽma Tupanamaã ixunetaxũ, natürũ nüma ya Tupana rü guxũguma nayan-

guxêê i ngêma tamaã inaxunetaxũ, erü taxuacüma nügütama nawomüxêê.

*Wüxi i mexũ i puracütanüxũ i Tupana namaã taãxũchiga*

<sup>14</sup> Rû ngêma yaxõgüxũ i cuxütawa ngëxmagüxũ, rû name nixĩ i Tupanaegagu nüxna nüxũ cucuêxâchixêê na tama nuxcümaũgüxũ i ore i taxuwama mexücèx nügümaã na yaporagatanücüxücèx. Erü ngêma rû wüxi i chixexũ nixĩ, rû nanachixeãêxêê i ngêma duüxügü i nüxũ ñnüêxũ.

<sup>15</sup> ¡Rû cugü naporaxêê na meã cunaxüxũ i Tupanaârü puracü na cumaã nataãêxücèx i ngëxguma napêxewa cunguxgux rû ngemaãcü taxucèxma cuxânexücèx i ngëxguma nüma cuxna nacaxgu naxcèx i curü puracüchiga! ¡Rû ngëmacèx name i aixcüma meã namaã cungúexêêtae i ngêma ore i mexũ i aixcüma ixĩxũ!

<sup>16</sup> ¡Rû nüxũ rüxo i ñoma i naãnecüãxârü dex-agümare i taxuwama mexũ! Erü ngêma duüxügü i ngêma dexagümaregu ñxũ, rû guxüguma yexeraãcü chixexügu nayi.

<sup>17</sup> Rû ngêma norü nguxêêtae i ngêma duüxügü, rû ñoma wüxi i daaweane i tüxũ íyimachixêêxürü nixĩ. Rû yema nixĩ ga nüxũ ngupetüxũ ga Imenêu rû Firetu.

<sup>18</sup> Yerü nidoragümare ga nüxũ na yaxugüexũ rû marü na nangupetüxũ i yuetaarü dachiga. Rû yemaãcü nanawomüxêêgü ga ñuxre ga duüxügü na tama noxrirüü yaxõgüãxücèx i Tupanaârü ore.

<sup>19</sup> Natürü Tupanaârü ore rû taguma inayarüxo rû taguma naxüchicüü. Rû ngêma norü orewa rû ñanagürü:

“Tórü Cori ya Tupana nüxũ nacuèx i texé tixĩ ya norü duũxũgü ixĩgũxe. Rü guxãma ya yíxema nüxũ ixuxe na Ngechuchu ya Cristu rü tümaãrũ Cori yĩxũ, rü name nixĩ i nüxna tixĩgachi i guxũma i chixexũ”,

ñanagürü i ngẽma norü orewa.

<sup>20</sup> Wüxi i duũxũ i dīeruãxũchixũ rü napatawa nangẽxma i poratu i uirunaxcèx rü dīerumünaxcèx. Rü nangẽxma ta i poratu i naĩnaxcèx rü waixũmünaxcèx. Rü ngẽma poratu i uirunaxcèx rü dīerumünaxcèx rü mexũ i norü ònacèx nixĩ. Natürü ngẽma poratu i naĩnaxcèx rü waixũmünaxcèx rü guxchirechixũ nixĩ.

<sup>21</sup> Rü ngẽxguma wüxi i yaxõxũ naxwèxegu na aixcũma mexũ i Tupanaãrũ puracütanũxũ na yĩxũ, rü name nixĩ i nüxna nixũgachi i guxũma i chixexũ. Rü ngẽxguma tá nixĩ i Tupanapẽxewa aixcũma naxüünexũ na naxüãxücèx i nagúxũraũxũ i puracü i Tupana namaã nüxũ ixuxũ.

<sup>22</sup> ¡Nüxũ rüxo i guxũma i ngẽma chixexũ i ngextüxücügü nagu rüxĩnüèxũ! ¡Rü meã Tupanapẽxewa namaxũ rü aixcũma nüxũ yaxõ! ¡Rü nüxũ nangechaũ i guxũma i duũxũgü, rü tãxũ i namaã cunuxũ! ¡Rü ngẽmaãcü namaxũ wüxigu namaã i guxũma i ngẽma duũxũgü i aixcũma Tupanacèx maxèxũ rü ngemaãcü yumüxègũxũ!.

<sup>23</sup> Rü tama name i naxcèx icurüxĩnü i ngẽma dex-agü i taxuwama mexũ. Erü ngẽma dexagügagu rü düxwa nügüchi naxaie i duũxũgü.

<sup>24</sup> Rü wüxi i Tupanaãrũ puracütanũxũ rü tama name na texemaã núcèx nadauxũ. Rü narümemaie nixĩ na guxãma namecũmaxũ.. Rü nanaxwèxe

i yaxna namaã naxĩnũácũma meã duũxũgũxũ nangúexẽẽ i Tupanaãrũ ore.

25-26 Rũ wũxi i Tupanaãrũ puracũtanũxũ rũ name na yaxna namaã naxĩnũácũma meã nayaxucuxẽgũãxũ i ngẽma duũxũgũ i tama irũxĩnũẽchaũxũ. Rũ name i ngẽmaãcũ ínananguxẽẽ na Tupana nũxũ rũngũxẽẽxũ i ngẽma duũxũgũ na nũxũ naxoexũcèx i norũ chixexũ rũ nũxũ nacuèxgũxũcèx i ngẽma ore i aixcũma ixĩxũ. Erũ Tupana nanaxwèxe na naxuãẽgũxũ i ngẽma duũxũgũ rũ nawa ínanguxũxũ i ngẽma chixexũ i ngoxo i Chataná nagu nayixẽẽxũ na noxrõtama ngúchaũ namaã naxũxũcèx.

### 3

*Nuxãcũ tá nixĩ i duũxũgũcũma i ngẽxguma nagúxchaũgu i naãne*

<sup>1</sup> Rũ chanaxwèxe i nũxũ cucuèx rũ ngẽxguma nagúxchaũgu i naãne rũ tá nangẽxma i ãũcũmaxũgũ rũ guxchaxũgũ naxcèx i duũxũgũ.

<sup>2</sup> Rũ duũxũgũ rũ tá nũgũguxicatama narũxĩnũẽ, rũ norũ dĩẽruguama tá narũxĩnũẽ. Rũ tá nũgũ nicuèxũxũgũ, rũ ngẽmaãcũ tãũtãma nũxũ nacuèxgũchaũ i togũ i duũxũgũ i tama naxrũũ taarũ dĩẽruãxgũxũ. Rũ chixri Tupanachiga tá nidexagũ, rũ tãũtãma nanatũga rũ naẽga naxĩnũẽchaũ. Rũ tãũtãma moxẽ inaxã i ngẽxguma Tupana nũxũ rũngũxẽẽgu, rũ ngẽmaãcũ tãũtãma nũxũ nacuèxgũchaũ i Tupanaãrũ ore.

<sup>3</sup> Rũ tãũtãma nagu narũxĩnũẽ i togũ i duũxũgũxũ na nangechaũgũxũ, rũ tãũtãma nũxũ nangechaũtũmũũgũ. Rũ tá naxoregũtèèxgũ,



rü täütáma nügü naporaexêê na yaxna namaã naxĩnüëxüçèx i naxũneârü ngúchaügü. Rü tá nichixecüma, rü tá naxchi naxaie i guxũma i ngema mexũ.

<sup>4</sup> Rü duũxügüechitawèxegüxũ tá nixĩgü, rü nuëwèxexũ tá nixĩgü, rü nügü icuèxüügüxũ tá nixĩgü. Rü tá norü ngúchaüçèxama nadaugü, rü täütáma Tupanaxũ nacuèxgüchaũ.

<sup>5</sup> Rü tá nügü nayaxögüxüchinetaxêê natürü ngêma norü chixexũ i naxügüxũwa tá nangoxoma na tama aixcüma yaxögüãxũ i ngêma ore i mexũ. Rü ngêma duũxügü i ngêmaãcü maxêxũ, rü tama name na namaã cuxãmücüxũ rü natanügu cuxãxũ.

<sup>6-7</sup> Erü ngêma duũxügütanüwa nangêxmagü i nümaxũ i ĩpatagu ichocuetanüxũ. Rü norü ngüxêetaemaã nayawomüxêëgü i ngêma ngexügü i ngema ngêxmagüxũ i tama naãêxũ icuáxũ rü chixri maxêxũ. Rü ngêma ngexügü, rü norü ngúchaügütama chixexũwa nanagagü, rü ngêmacèx woo guxüguma nangúe natürü taguma aixcüma nüxũ nacuèxgü i ngêma ore i aixcüma ixĩxũ.

<sup>8</sup> Rü ngêma duũxügü i chixexũmaã ngüxêetaegüxũ, rü chixexügüxicatama narüxĩnüë, rü tama aixcüma nayaxögü i Tupanaârü ore. Rü naxchi naxaie i ngêma ore i aixcüma ixĩxũ, naxrũũ ga yema yuũxügü ga Yane rü Yáũbre ga tama Moĩchéga ĩnüëchaũxũ.

<sup>9</sup> Natürü täütáma muxũ i duũxügü nüxũ nayaxögü. Erü guxũwama i duũxügü rü tá nüxũ nicuèxãchitanü na wüxi i duũxügü i chixexügu rüxĩnüexũ rü ngeãëmarexũ yixĩgüxũ naxrũũ ga yema taxre ga tama Moĩchéga ĩnüëchaũxũ.

*Ucuxēmaã inyacuèxēẽ ga Pauru na Timutéumaã yadexaxĩ*

10-11 Natürü cumax, Pa Timutéux, marü nüxũ cucuèx ga ñuxãcü meã na chanangúexēẽxũ ga duũxũgü, rü ñuxãcü meã chamaxũxũ, rü ñuxãcü nagu charüxnũxũ rü meã chayaxõxũ, rü ñuxãcü yaxna namaã chaxĩnũxũ ga duũxũgü rü nüxũ changechaũxũ. Rü cuma nüxũ cucuèx ga ñuxãcü na chaugü chaporaxēẽxũ na yaxna namaã chaxĩnũxũ i guxchaxũgü. Yerü ga duũxũgü rü chowe ningexũtanü na choxũ yamèxgüxücèx. Rü cuma rü nüxũ cucuèx ga tacü choxũ na üpetũxũ ga Aũtioquíawa rü Içúniũwa rü Listrawa, rü ñuxãcü chowe na yangexũtanũxũ rü poraãcü ngúxũ chingexũ. Natürü tórü Cori ya Tupana choxũ ínapoxũ na tama choxũ yamèxgüxücèx.

12 Rü aixcüma cumaã nüxũ chixu rü guxãma ya yíxema naxwèxegüe na Ngechuchu ya Cristucèx tamaxẽxũ, rü togü tá tùmachi naxaie rü chixri tá tùmamaã nachopetü.

13 Natürü ngẽma duũxũgü i chixecümagũxũ rü ngẽma duũxũgü i idoratèèxgüxũ rü yexeraxũ i chixexũgu tá nayi. Erü Chataná marü nayawomüxēẽgü, rü ngẽmacèx nüxĩ togũxũ nawomüxēẽgü.

14 Natürü i cuma rü name nixĩ i guxũguma meã nagu quixũ i guxũma i ngẽma ore i marü cungúxũ. Erü cumatama rü nüxũ cucuèx na aixcüma yĩxũ i ngẽma ore, rü nüxũ cucuèx na texégü tixĩgũxũ ga guxema namaã cuxũ ngüxēẽgüxe.

15 Rü cuma nüxũ cucuèx rü cubuxgumamatama nawa cungux i ngẽma Tupanaãrü ore i üünexũ. Rü ngẽmawa cunayaxu i cuèx na nüxũ cucuáxücèx i

ñuxãcü tüxũ na nangẽxmaxũ i maxũ i taguma gúxũ ega Ngechuchu ya Cristuaxũ yaxõgũgu.

16 Rũ guxũma i Tupanaãrũ ore i ümatũxũ rũ nügüãewatama nanayaxu ga Tupana. Rũ ngẽma ore rũ name na duũxũgũxũ namaã ingúexẽxũ, rũ namaã yaxucuxẽgũxũ rũ namaã iyanawẽxãchixẽgũxũ, rũ namaã nangúexẽxũ na meã Tupanapẽxewa namaxẽxũcèx.

17 Rũ ngẽmaãcü i ngẽma ore rũ tüxũ narüngũxẽẽ ya yíxema Tupanaãrũ ixĩxẽ, na meã nüxũ tacuáxũcèx i ngẽma Tupana naxwèxexũ rũ ítamemarexũ na tanaxũxũ i nagúxũraũxũ i puracü i Tupana tümamaã nüxũ ixuxũ.

## 4

1-2 Rũ nüma ya Ngechuchu ya Cristu ya núma tá ücü na nüxũ yacagũxũcèx i ngẽma duũxũgũ i maxẽxũ rũ ngẽma marü yuechiréxũ, rũ yimapẽxewa rũ Tupanapẽxewa cuxũ chamu na nüxũ quixuxũcèx i ngẽma ore i mexũ. Rũ ngẽxguma cuxũ yatauxchaãchigu rũ woo cuxũ naguxchagu, rũ chanaxwèxe i nüxũ quixuama i ngẽma ore. Rũ ngẽmaãcü chanaxwèxe na icuyanawẽxãchixẽgũxũ rũ meã cuyaxucuxẽgũxũ rũ nüxũ cunangúchaũxẽxũ i duũxũgũ. Rũ name nixĩ i yaxna namaã cuxĩnũãcüma meã cunangúexẽẽ.

3 Erü yixcũra i duũxũgũ rũ tãütáma nüxũ naxĩnüẽchaũ i ngẽma nguxẽẽtae i mexũ. Erü ngẽma duũxũgũ rũ nichixecüma. Rũ ngẽmacèx naxcèx nadaugũ i norü ngúexẽẽruũgũ i nüma nanaxwèxegũxũãcüma nangúexẽẽxũ.

4 Rū tāūtáma nüxũ naxĩnüēchaũ i Tupanaãrũ ore i aixcũma ixĩxũ. Erũ ngẽma ore i doramare ixĩxũguama tá narũxĩnüē.

5 ¡Natũrũ cuma rũ meã cugũna nadau, rũ ínaxuãē, rũ namaã naporã ega ngúxũ cuxũ üpetũgu! ¡Rũ nüxũ iXuama i ore i mexũ i tũxũ maxẽxẽxũ, rũ meã yanguxẽē i ngẽma puracũ i Tupana cuxna ãxũ!

6 Tãūtáma muxũ i ngunexũ ñoma i naãnewa changẽxma erũ marũ choxũ ningaica na Tupanaãrũ puracũ chaxũxũgagu chayuxũ rũ choxũ na yamèxgũxũ i duũxũgũ.

7 Rũ choma rũ marũ chayanguxẽē i ngema puracũ i Tupana choxna ãxũ. Rũ ñuxma na nagúxũ i ngema puracũ rũ taguma nüxũ charũxo na chayaxõxũ.

8 Rũ ñuxma rũ marũ Tupana choxũ namaã nanguxũ i ngẽma ãmare i mexẽchixũ ya tórũ Cori ya Ngechuchu ya ãẽxgacũ ya mecũ tá choxna ãxũ i ngẽxguma wenaxãrũ ñoma i naãnewa naxũxgu. Rũ tāūtáma chaxica choxna nanaxã i ngẽma ãmare, natũrũ tá tũxna nanaxã ya guxãma ya yĩxema tũmaãrũ ngúchaũmaã ínanguxẽēgũxe na wenaxãrũ núma naxũxũ.

### *Timutéuxũ naxucuxẽ ga Pauru*

9 Cumaã nüxũ chixu rũ chanaxwèxe i paxa nuã cuxũ, rũ choxũ ícuyadau.

10 Demã rũ ñoma i naãneãrũ ngẽmaxũgu naxĩnüxũgagu choxna nixũ rũ ñãne ga Techarónicawa naxũ. Rũ Crechéũte rũ Gárataanewa naxũ, rũ Titu i Darumáchiaanewa.

11 Rũ Lucaxicatama nixĩ i ñuxma chauxũtawã ngẽxmaxũ. Rũ chanaxwèxe i naxcèx cudau i Marcu

na nuã cunagaxücèx. Erü nüma rü chauxcèx name na choxü na nangüxëëxü i ñãã puracüwa.

<sup>12</sup> Rü Tíquicu rü ñãne ya Epéchiuwa chanamu.

<sup>13</sup> ¡Ngëxguma nuã cuxüxgu rü nuã nange i chorü gáuxüchiru ga ñãne i Tróawa ngëxmaxü ga Carpu-patawa chatáxü! Rü chanaxwèxe i nuã cunana i chorü poperagü. Rü guxüãrü yexera chanaxwèxe na nua cunanaxü i chorü poperagü i idixgüpütaxü.

<sup>14</sup> Areyáüdrü i cobrenaxcèx i buetarearü üwa puracüxü rü poraãcü chixri chomaã naxüpetü. Natürü Tupana nüxü nacuèx i ñuxãcü tá na napoxcuãxü naxcèx ga yema chixexü ga chomaã naxüxü.

<sup>15</sup> ¡Meã cugüna nadau na tama chixexü cumaã naxüxücèx! Erü poraãcüxüchima naxchi naxai i Tupanaãrü ore i mexü.

<sup>16</sup> Yexguma noxrixüchima ãëxgacügüpëxewa chaugüétüwa chideaxgu rü taxüema choxü tarüngüxëë. Guxüma choxna nibuxmü. Natürü tama chanaxwèxe ya Tupana rü nagu narüxĩnü i ngëma.

<sup>17</sup> Natürü tórü Cori choxü naporaxëë rü choxü narüngüxëë na choxü natauxchaxücèx na nüxü chixuxücèx ga norü ore i mexü i tüxü maxëxëëxü. Rü yemaãcü guxüma ga yema duüxügü ga tama yaxögüxü ga yéma yexmagüxü rü nüxü naxĩnüë ga yema ore. Rü yemaãcü tórü Cori ya Ngechuchu choxü ínguxuchixëë ga yexguma taxü ga äücümaxüwa chayexmagu.

<sup>18</sup> Rü nüma ya tórü Cori tá choxü ínguxuchixëë nawa i guxüma i chixexügü. Rü tá choxna nadau na ngextá äëxgacü íyĩxüwa choxü nagaxücèx. Rü name i guxüguma nüxü ticuèxüügü. Rü ngëmaãcü

yĩ.

*Pauru rü wenaxãrũ Timutéuxũ narümoxẽ rü naxcèx ínaca na Cori ya Ngechuchu ya Cristu nüxũ rüngũxẽxũ*

<sup>19</sup> Chanaxwèxe i chauégagu nüxũ curümoxẽ i Prisila, rü Aquiru, rü Onechéperutanüxũgü.

<sup>20</sup> Eratu rü ããne i Corĩtiugu narüxãũx. Rũ Turuquínu rü idaawexũma ããne i Miretuwa chanaatèx.

<sup>21</sup> Rũ naxũpa i gáuanexũ rü chanaxwèxe i nuã cuxũ. Rũ cuxũ narümoxẽgü i Eubúru, rü Prudẽte, rü Linu, rü Cáudia, rü guxũma i taeneẽgü i yaxõgũxũ.

<sup>22</sup> Rũ chanaxwèxe i tórü Cori ya Ngechuchu ya Cristu cumaã nangẽxma, rü Tupana pexũ narüngũxẽẽ ya guxãma i pemax.

Rũ nuãma pexna,  
Pauru

# **Tupanaarü Ore i Tóru Cori ya Ngechuchu ya Cristuchiga**

## **New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6